

Grischun e Turitg profitan dal World Economic Forum (FEM)

Communicaziun cuminaivla dals chantuns
Grischun e Turitg a las medias

■ **(cc) Ils chantuns Grischun e Turitg han manà tras ier saira a l'ur dal World Economic Forum (FEM) in'occurrentza per l'economia ch'è vegnida organisada da las duas direcziuns chantunals da l'economia publica. En in referat èn interpresas interessadas vegnidas infurmas d'in expert davart las schanzas e las sfidas per interpresas svizras en ils martgads da l'Asia.** Mintga onn sa scuntan numerus represchentants impurtants da l'economia e da la politica la fin da schaner a Tavau al World Economic Forum (FEM). Ils chantuns Grischun e Turitg han infurmà a l'ur dal FEM interpresas interessadas davart las schanzas e las sfidas per interpresas svizras en ils martgads da l'Asia. A la tschaina d'interprenderers èn sa participads var 40 persunas sco er plirs cussegliers guvernativs dals chantuns Grischun e Turitg. Ils represchentants da las duas regenzas han profità da l'occurrentza per tgirar contacts cun represchentants da l'economia.

Ils martgads creschents da l'Asia sco schanza per interpresas svizras

Ils martgads creschents da l'Asia èn ina gronda schanza per interpresas svizras. Sch'ina interpresa sa decida d'entrar en il martgà da l'Asia, resultan da quai schanzas attractivas e lucrativas. Il medem mument na dastgan las sfidas però

betg vegnir sutvalitadas. En ses referat infurmativ ha *Kishore Mahbubani*, professor da politologia e decan da la Lee Kuan Yew School of Public Policy a l'Universitad naziunala da Singapore, tractà las schanzas e las sfidas per interpresas svizras en ils differents martgads da l'Asia. Suentar il referat hai dà in barat d'ideas ed ina discussiun cun occasiun per far dumondas.

Approfondar la collavuraziun dal Grischun e da Turitg

Ils chantuns Grischun e Turitg han gia dapli blers onns ina collavuraziun buna e stretga, per exempel en il rom da la conferenza da las regenzas dals chantuns da la Svizra orientala. Cun la preschientscha cuminaivla al FEM vegn questa collavuraziun cumplettada d'in ulteriur chapitel e duai vegnir cuntinuada en l'avegnir. Las planisaziuns che curran actualmain per in parc d'innovaziuns naziunal cun Turitg sco lieu central e cun differents lieus affiliads porscha l'occurasiun per ina collavuraziun anc pli stretga, per exempel en il sector da las ciencias biologicas (life science).

Turitg po offrir en quest connex competenzas en il sector da la tecnologia biologica e medicinala ed il Grischun po contribuir sco puncts centrals las applicaziuns en il sector da la tecnologia medicinala.